



Terenga 6: Hōtaka 18 - A me te O: He whakaū

He Mihi

Tini whetū ki te rangi, he mumu reo ki te whenua. Tēnā tātou kua pōi mai anō ki te rauhitanga o te hunga ngākaunui ki te whakatairanga i te reo Māori.

Hei Mahi Whakarongo

Mei kore ake te hōtaka o Whakataukī, e rangona ai ngā whakamārama a tēnā iwi, a tēnā iwi mō ōna anō kōrero. I te rā nei, ko Che Wilson te kaikōrero. He manu te kaupapa o te whakataukī e whakamāramahia ana. Anei ngā pātai hei whakautu mā koutou:

- 1) Nō tēhea iwi te kaituku i tēnei whakataukī?
- 2) He aha ngā kōrero mō te kaituku?
- 3) He aha te ngako o te whakataukī?

Kia whakarongo ake tātou ki te toki kōrero o Whanganui, ki a Che Wilson.

He Whakamārama

I a tātou ka whakatau ko tēhea pūriro ka piri ki ngā rirohanga, me āta whakaaro ki te horopaki o te kōrero. Ehara i te mea ka tau te 'āporo' ki raro i te maru o te pūriro 'a' i ngā wā katoa, nā te mea he kai te āporo. Tēnā tirohia ēnei tauria:

- a) Kei roto i tana pēke te āporo a Mere. (kai)
- e) He maha ngā āporo o te pēke rā. (wāhanga)

Katoa ngā mea ka tau ki raro i te 'A', ka noho hoki ki raro i te 'O' mena he wāhanga taua mea nō tētehi atu mea, pēnei i te tauria o mua tata ake nei.

Katoa ngā mea ka tau ki raro i te 'O' ka noho hoki ki raro i te 'A' mena he auahatanga taua mea nā tētehi tangata. Anei ētehi tauria:

- i) Kua mā ngā tōkena o Pētera.
- o) Kua puta ngā tōkena hou a Nike ki roto i ngā toa.

He Mahi Ī-papa



Tuhia he rerenga kōrero e hāngai ana ki te horopaki o te mātauranga.

Hei Mahi

Tuhia ngā rerenga kōrero e rua hei whakaatu i te whai wāhitanga o ngā pūriro 'A' me 'O' ki te rirohanga.

1. whānau
2. waka
3. whare

Whakautu:

Mahi Īpapa: I puta i te tupuna rā tāna whakataukī mō te mātauranga.

Hei Mahi:

1. (A) Kei te tipu te whānau a Te Rina. (O) He maha ngā whānau o Te Kōhanga Reo
2. (A) He waka hou tā Ford. (O) He Ford te waka o Riripeti.
3. (A) Ka hoko māua i tētehi o ngā whare a Jennian. (O) Nā Jennian te whare o Kewa.